



Borgarráð
Ráðhús Reykjavíkur

Efni: Tillaga fulltrúa í ungmennaráði Árbæjar og Holta um opnunartíma félagsmiðstöðva

Á fundi skóla- og frístundaráðs þann 12. júní 2023 var lagt fram bréf skrifstofu borgarstjórnar, dags. 23. febrúar 2023, um svohljóðandi tillögu Emilíu Nætur Starradóttur, fulltrúa í ungmennaráði Árbæjar og Holta, sem á fundi borgarstjórnar 14. febrúar 2023 var vísað til meðferðar skóla- og frístundaráðs ásamt minnisblaði sviðsstjóra skóla- og frístundasviðs, dags. 11. maí 2023, um tillöguna:

Lagt er til að borgarstjórn hætti við að stytta opnunartíma í félagsmiðstöðvum og sé í samskiptum við ungmennaráð borgarinnar áður en teknar eru ákvarðanir um frístundastarf unglunga.

Greinargerð fylgdi.

Skóla- og frístundaráðsfulltrúar Samfylkingarinnar, Framsóknarflokksins og Pírata lögðu fram svohljóðandi breytingartillögu:

Lagt er til að opnunartími félagsmiðstöðva verði stytur um 15 mínútur á mánudögum og miðvikudögum en opnunartími verði ekki stytur á föstudögum. Félagsmiðstöðvar hagræði sem samsvarar því fjármagni að hafa opið í 15 mínútur með öðrum leiðum.

Samþykkt með fjórum atkvæðum skóla- og frístundaráðsfulltrúa Samfylkingarinnar, Framsóknarflokksins og Pírata gegn þremur atkvæðum skóla- og frístundaráðsfulltrúa Sjálfstæðisflokksins og Sósíalistaflokks Íslands.

Tillagan var samþykkt svo breytt með fjórum atkvæðum skóla- og frístundaráðsfulltrúa Samfylkingarinnar, Framsóknarflokksins og Pírata gegn þremur atkvæðum skóla- og frístundaráðsfulltrúa Sjálfstæðisflokksins og Sósíalistaflokks Íslands.

Skóla- og frístundaráðsfulltrúar Sjálfstæðisflokksins lögðu fram svohljóðandi bókun:

Skóla- og frístundaráðsfulltrúar Sjálfstæðisflokks vilja byrja á því að þakka fyrir þá vinnu sem lögð hefur verið í tillögugerð ungmennaráðs Árbæjar og Holta. Efnislega er tillaga ungmennaráðsins tvíþætt, í fyrsta lagi að borgarstjórn hætti við að stytta opnunartíma í félagsmiðstöðvum og í öðru lagi að samráð eiga að vera haft við ungmennaráð borgarinnar þegar svona ákvarðanir eru teknar. Miðað við mikilvægi málefnisins fyrir hagsmuni unglunga er óhætt að taka undir tillögu ungmennaráðsins. Hér er sérstaklega haft í huga það ríka forvarnargildi sem félagsmiðstöðvar hafa. Sparnaðurinn af styttingu opnunartímans er rýr og næg tækifæri annars staðar í borgarkerfinu til að spara álíka fjárhæð. Einnig er sú ábending réttmæt, sbr. 2. ml. 2. mgr. 11. gr. æskulýðslaga nr.



80/2007, að sveitarfélag eigi að hafa samráð við ungmennaráð um málefni sem varða hagsmuni þeirra. Að lokum skal þess getið að á veturna er útivistartími 13-16 ára lengri en sem nær til kl. 22:00, sbr. 1. mgr. 92. gr. barnaverndarlaga nr. 80/2002.

Skóla- og frístundaráðsfulltrúi Sósíalístaflokks Íslands lagði fram svohljóðandi bókun:

Það er bagalegt að meirihlutinn hafi ekki getað dregið styttri opnunartíma félagsmiðstöðva til baka. Rökin fyrir þeim aðgerðum eru hagræðingar en eins og dæmin sýna vitum við að svona niðurskurðir munu kosta samfélagið meira til lengri tíma lítið. Samfés sem starfa í þágu ungs fólks um land allt hafa gagnrýnt þessar breytingar og benda á tvískinnunginn þegar meirihlutinn segist vera að vinna út frá hugmyndafræðinni Betri borg fyrir börn. Samfélagið kalli eftir auknu forvarnarstarfi og langtímaafleiðingar þess að draga þar úr muni kosta samfélagið mikið. Hinn eini sanni sparnaður felist í því að halda áfram og auka frekar við það öfluga og faglega forvarnarstarf sem fer fram í starfi félagsmiðstöðva Reykjavíkurborgar.

Áheyrnarfulltrúi framkvæmdastjóra frístundamiðstöðva lagði fram svohljóðandi bókun:

Áheyrnarfulltrúi framkvæmdastjóra frístundamiðstöðva í skóla -og frístundaráði vill þakka ungmennaráði Árbæjar og Holta fyrir vandaða og góða tillögu um að hætt verði við að stytta opnunartíma félagsmiðstöðva í Reykjavík og ósk þeirra um samráð um aðgerðir sem snúa beint að ungmennum. Áheyrnarfulltrúi framkvæmdastjóra frístundamiðstöðva tekur undir þau sjónarmið sem komu fram á fundinum að niðurskurðurinn er ansi rýr í krónum talið miðað við þá þjónustu skerðingu sem verður á opnunartíma félagsmiðstöðva. Áheyrnarfulltrúi framkvæmdastjóra hvarfar það mjög að ekki skuli hafa verið haft samráð við ungmennaráð Reykjavíkurborgar og ekki hlustað betur á raddir þeirra. Það ber þó að virða þá viðleitni að koma til móts við tillöguna með því að stytta ekki opnun á föstudögum.

Virðingafyllst

Helgi Grímsson

sviðsstjóri skóla- og frístundasviðs

Hjálagt:

Bréf skrifstofu borgarstjórnar, dags. 23. feb. 2023

Minnisblað, dags. 11. maí 2023

Skóla- og frístundaráð

Tillaga fulltrúa í ungmennaráði Árbæjar og Holta um að hætt verði við að stytta opnunartíma félagsmiðstöðva í Reykjavík

Á fundi borgarstjórnar þann 14. febrúar 2023 var lögð fram svohljóðandi tillaga Emilíu Nætur Starradóttur, fulltrúa í ungmennaráði Árbæjar og Holta:

Lagt er til að borgarstjórn hætti við að stytta opnunartíma í félagsmiðstöðvum og sé í samskiptum við ungmennaráð borgarinnar áður en teknar eru ákvarðanir um frístundastarf unglínga.

Greinargerð:

Unglingar í Reykjavík eru ósáttir við ákvörðun borgarstjórnar um að stytta opnunartíma í félagsmiðstöðvum Reykjavíkur. Skoðanir unglínga skipta máli og okkur finnst að það ætti að tala við ungmennaráðin áður en ákvarðanir eru teknar um mál sem tengjast ungmennum í Reykjavík.

Samþykkt var að vísa tillögunni til meðferðar skóla- og frístundaráðs.

Athygli er vakin á því að tillagan var ekki samþykkt á fundinum og fara skal með hana á sama hátt og önnur mál sem koma til meðferðar af fundi borgarstjórnar. Í því felst að hana ber að leggja fram, taka hana til meðferðar og afgreiða eins skjótt og unnt er. Boða skal fulltrúa úr Reykjavíkurráðinu á fund ráðsins til að kynna efni tillögunnar.

Lögð er áhersla á það að tillagan fái formlega afgreiðslu á vettvangi ráðsins.

Óskað er eftir því að forsætisnefnd verði upplýst reglulega um framvindu málsins og um endanlega afgreiðslu tillögunnar. Afrit af þeim bréfum ber að senda á tengilið Reykjavíkurráðs ungmenna, Huldu Valdísi Valdimarsdóttur, verkefnastjóra á skóla- og frístundasviði. Stöðufundur með fulltrúum Reykjavíkurráðsins verður haldinn á haustmánuðum. Þar verður farið yfir afgreiðslur tillagna af sameiginlegum fundi borgarstjórnar með Reykjavíkurráðinu. Er mælt til þess að tillagan verði afgreidd af skóla- og frístundaráði fyrir þann tíma.



Helga Björk Laxdal

e.u.



MINNISBLAÐ

Viðtakandi: Skóla- og frístundaráð

Sendandi: Helgi Grímsson, sviðsstjóri skóla- og frístundasviðs

Varðandi tillögu fulltrúa í ungmennaráði Árbæjar og Holta um að hætt verði við að stytta opnunartíma félagsmiðstöðva í Reykjavík

Á fundi borgarstjórnar þann 14. febrúar 2023 var lögð fram svohljóðandi tillaga Emilíu Nætur Starradóttur, fulltrúa í ungmennaráði Árbæjar og Holta:

Lagt er til að borgarstjórn hætti við að stytta opnunartíma í félagsmiðstöðvum og sé í samskiptum við ungmennaráð borgarinnar áður en teknar eru ákvarðanir um frístundastarf unglinga.

Greinargerð fylgdi tillögunni.

Umsögn skóla- og frístundasviðs:

Í fjárhagsáætlun Reykjavíkurborgar fyrir árið 2023 þurfti að hagræða víða í rekstri borgarinnar m.a. vegna óhagstæðra ytri skilyrða innanlands sem utan. Rýna þurfti allan rekstur vel og vandlega og skoða hvar mögulega mætti hagræða. Fjöldinn allur af tillögum var rýndur vel hjá öllum sviðum borgarinnar og sú tillaga að hagræða um fimmtán mínútur í kvöldopnunum félagsmiðstöðva var ein af þeim sem ákveðið var að samþykkja.

Við að stytta opnunartíma um 15 mínútur í kvöldopnunum félagsmiðstöðva sparast um 5,1 milljón á haustönn 2023 og 6,2 milljónir á vorönn 2024 þ.e.a.s. um 11,3 milljónir á ársgrundvelli.

Til að milda þessa hagræðingu er lagt til að opnunartími félagsmiðstöðva verði stytur um 15 mínútur á mánudögum og miðvikudögum en ekki á föstudögum. Félagsmiðstöðvarnar finni leiðir til að hagræða fyrir þessum 15 mínútum á föstudagskvöldum með öðrum leiðum s.s. lækkun á starfshlutfalli hlutastarfsfólks, minnkun á yfirvinnu, lækkun á miðlægum kostnaði o.fl. Félagsmiðstöðvarnar skili því hagræðingu í rekstri upp á 11,3 milljónir á ársgrundvelli.

TILLAGA

Viðtakandi: Skóla- og frístundaráð

Sendandi: Skóla- og frístundaráðsfulltrúar Samfylkingarinnar, Framsóknarflokksins og Pírata

***Breytingartillaga skóla- og frístundaráðsfulltrúa Samfylkingarinnar,
Framsóknarflokksins og Pírata um opnunartíma félagsmiðstöðva***

Lagt er til að opnunartími félagsmiðstöðva verði stytur um 15 mínútur á mánudögum og miðvikudögum en opnunartími verði ekki stytur á föstudögum. Félagsmiðstöðvar hagræði sem samsvarar því fjármagni að hafa opið í 15 mínútur með öðrum leiðum.